



13 800 han visitau l'Ems-Chemie

Il di dallas portas aviartas la sonda vargada ei stau in grond success

DA HANS HUONDER / ANR

■ **Biaras Grischunas e biars Grischuns ein carrai ina ga ni l'autra a Domat sper l'Ems-Chemie ora. La sonda vargada ei se-purschii la caschun da mirar davos las culissas**

Buca meins che 1000 emploiadadas ed emploiai sco era 140 collaboraturas e collaboratur en plazzas parzialas ein engaschai sigl areal dall'interpresa a Domat ch'occupa sigl entir mund bunamein 3000 persunas. Ultra da quei vegnan 140 giuvnas e giuvens scolai en 13 differents emprendissadis. Ils cuosts da paga annuals contonschan la summa da 100 milliuns francs. Quei ei cefras impressiunontas che muossan con impurtonta che l'Ems-Chemie ei pil Grischun sco patruna. Che l'interpresa ei d'interess per la publicitad ha il di dallas portas aviartas la sonda mus-sau. 13 800 visitadras e visitaders han vuliu dar in sguard davos las culissas dil menaschi ch'ei engaschais sil sector dil material sintetic special. La scheffa dall'Ems-Chemie, *Magdalena Martullo*, ei lu era stada satisfatga da quei di:



Magdalena Martullo cun entgins dils 140 emprendists sco era menaders d'emprendists.

FOTO H. HUONDER

«Jau haiel grond plascher che tanta glieud ha visitau nus. Tuttas collaboraturas e tuts collaboraturers sco era ils biars auters gidonters han contribuui al grond suc-

cess da quei di. Jeu selegrel gia sil proxim di dallas portas aviartas.» Tgisà, forse cuoza ei quella ga buca diesch onns entochen ch'il proxim di dallas portas aviartas ha

iug. Il davos era numnadamein vegnius arranschais igl onn 2007.



L'Ems-Chemie ha envidau e la glieud ei vegnida en roschas

Pign e grond han schau inspirar dalla vasta purschida la sonda vargada

■ (anr/hh) Il di dallas portas aviartas dall'Ems-Chemie la sonda vargada ei stada in grond success. La gronda purschida ha plidentau giuven e vegl. In sguard davos las culissas dil menaschi muossa tgei gronda muntada che quel ha pil Grischun. In'ura avon l'avertura ufficiala ein las empremas visitadras ed ils emprems visitaders gia stai en colonna avon l'entrada digl areal dall'Ems-Chemie. Leu han ils sunatibas digl Ensemble Engiadina, la Musica da Domat ed ils Tamburs da Domat fatg il beinvegni musical. D'emperneivlas temperaturas han 13 800 visitadras e visitaders sco era rondund 150 hosps ord l'economia e la politica mirau cun marveglias il svilup dall'interpresa ed ils stabiliments da produczion dalla pli gronda patruna e scoladra d'emprendistas e d'emprendists el Grischun. Els han giu la caschun da prender investa dil mund fascinont dil material sintetic special. Grazia allas numerusas attraccziuns, il program da tribuna captivont e la purschida culinara generusa, messa a disposiziun da GastroGrischun, ha pign e grond gudiu in di fascinont sigl entir areal dalla fabrica. Stada presenta durent igl entir di ei la scheffa dall'Ems-Chemie, *Magdalena Martullo*. Sin differents stans ha ella era informau visitadras e visitaders.

In tschuppel attraccziuns

Tgi ch'ha vuliu veser tut quei ch'ei vegniu presentau la sonda sigl areal dall'Ems-Chemie ha stuiu impunder persunter bunamein duas uras. Suenten in cuort viadi atras la historia dad 83 onns dall'interpresa han els giu la caschun d'admirar sin 1500 meters quadrat varga 3000 applicaziuns innovativas da material sintetic special dall'EMS – da cumponentas per motors d'autos che supportan temperaturas extremas entochen ad elements ultralevs per velos ed il roboter multimedial «Ro-

bi». En biars products cattan ins oz material sintetic dil Grischun. La guidada ha cuntinuau tras il center da svilup modern, sperasvi a staziuns da scargar materias primas, per liung da numerus conducts, tras vasts indrezs da produczion e d'emballoscha entochen al magasin a regals aults – in dils treis ils pli gronds sigl entir mund – danunder ch'ils materials sintetics dall'EMS vegnan spedi en tuttas tiaras pusseivlas.

Biaras informaziuns

L'Ems-Chemie ei denton buca mo innovativa sil sector da ses products. Mintg'onni investescha ella numnadamein era 15 miliuns francs ella proteccziun digl ambient e la segirtad. Dapi igl onn 2001 ha ella reduciu il consum d'energia per bunamein 50 pertschien. Ils materials sintetics dall'interpresa el Plaun ein tuttina robusts sco metal, mo ins sa reciclar ellas entochen diesch ga. Mintg'ura vegnan 400 sacs granulats da material sintetic emplen e transportai cun la viafier a Rotterdam e da leu cun bastiment ell'Asia. Al di dallas portas aviartas ein denton buca mo ils implonts da produczion vegni presentai alla publi-

cidad. L'interpresa ha purschiu in vast program da rama. Aschia ein ils pumpiers dall'ovra stai a disposiziun per demonstra-ziuns. Allas visitadras ed als visitaders ei vegniu purschiu bia cultura da musica, cant e sault e leutier entginas purschidas veramein specialas sco ina demonstra-ziun cun tgauns. In'attraccziun ei era il «Mungga-Trail» staus, ina rudlera gigantica cun ina lunghezia da varga 120 meters e nundumbrevilas stortas, loopings ed indrezs per alzar las ruclas. Quei indrez ei vegniu sviluppaus e construius dallas emprendistas e dils emprendists dall'interpresa.

Dalla regiun per la regiun

Cun la purschida dalla sonda vargada ha l'Ems-Chemie denton era vuliu dar la caschun a producentas e producents dalla regiun da sepresentar. *Vanessa T.* – ina giuvna da 15 onns da Cuvlignas – ha fascinau cun sia vusch aschi bein sco la Gruppa da costumes da Glion e contuorn ch'ha schau reviver cun ses costumes e ses saults la tradiziun grischuna. Estis *Line-dancers* da Lai e steel4ever, la formaziun da steeldrums da Tavau, han slargau il spectrum musical e procurau per ina bun'atmosfera. Naturalmeins che la prominenzia ha era buca muncau la sonda. Denter quella la presidenta dil cussegl grond *Tina Gartmann-Albin*, il president dalla regenza *Jon Domenic Parolini* ed il cusseglier guvernativ *Mario Cavigelli* sco era il president communal da Domat *Erich Kohler*. Dalla partida ei denton era igl anteriur cusseglier federal ed il patron d'honor dall'EMS *Christoph Blocher* staus aschi bein sco il president dil cussegl d'administraziun dall'EMS *Ulf Berg*. Tras il program han *Sven Epiney* ed *Annina Campell* menau. La finfinala ei era vegniu purschiu enzatgei bien pil magun. Igl ei sepurschiu la caschun da guder specialitads digl entir cantun Grischun.

Cefras e fatgs dil di dallas portas aviartas

Visitadras e visitaders: 13 800
Ligiongias barsadas: 12 000
Tastginas da verduras: 2500
Bubrondas: 15 000 liters
Purziuns da glatsch: 8000
Giradas cun la roda panoramica: 6500
Girs tras la fabrica: 5400



Magdalena Martullo presenta differents products scaffi cun materia sintetica speciala dall'Ems-Chemie.

FOTOS H. HUONDER



La glied ei vegnida en roschas.



La puschida ha plidentau glied da tutta vegliadetgna.



Allas visitadras ed als visitaders ei vegniu mussau en detagl tgei che vegn produciu ell'ovra a Domat.



Ilis pumpiers han demonstrau lur savida.



La cultura grischuna da costumes e musica ha buca muncau al di dallas portas aviartas.



Ina demonstraiziun cun tgauns ha completau la vasta purschida.